

四庫全書

集部

欽定四庫全書

震澤集卷十三

明 王鏊 撰

序

匏菴家藏集序

文章不難於奇麗難於醇難於典則雖然醇與則可能也醇而不俚則而能暢殆有非力所至而至者焉其必由養乎是難能也故禮部尚書兼翰林院學士文定吳公官禁近前後三十餘年文章傳播中外公既卒其子

中書舍人爽刻其所謂家藏集者授予請序予嘗竊評公之文矣擺脫尖新力追古作豐之千言不見其有餘約之數語不見其不足為詩興寄間遠不為浮豔之語用事精切不見斧鑿之痕自謂得公之深也茲復何言乎獨念公生頗好蘇學其於長公每若數數然者及其自著乃獨異焉紆餘有歐之態老成有韓之格信其學力之至自得者深乎其所養可知已明興作者代起獨楊文貞公為第一為其醇且則也公之文視文貞吾未

知所先後使獲當路於時其功業豈少哉議者至今惜
焉而公所以自託於不朽者固自有在又何待於彼者
與予獲從公久每以道義相剴切其於序有不得辭公
所著自當信今傳後云家藏者謙也詩諸體凡三十卷
序記碑銘雜著四十卷

贈南京兵部尚書林公復官序

昔之識者常以一人之進退占天下之治忽方逆瑾柄
朝濁亂海內泉山公以直道不容去及逆瑾伏法公道

大明泉山公以論薦復舊銜然則公之進退非可以占
吾道之隆替乎公子利瞻來守吳郡郡之士夫皆作歌
詩為公賀予以為公今日之進固可賀不若前日之退
可賀尤大何也方瑾勢盛士之頑頓無恥者或望塵乞
哀或媚竈祈進或脂韋其間以求容甚者藉其勢以中
傷善類揚揚自以為得也不三四年則誅則殛則流則
削向之赫奕者今皆安在而公之官則已復矣然則貪
榮嗜進者將以何為而作奸害正者亦復何益公獨先

事去之瑾不得而榮辱也故曰可賀尤大夫君子之自
守一於義一於義進亦榮退亦榮退而榮者何也中無
所媿焉耳小人則不然進亦辱退亦辱進而辱者何也
中有所媿焉耳公於進退之間色無愠喜而吳人必欲
一賀者賀吾道之泰也予與公同在翰林有同官之雅
在吏部有交承之分于今郡公又有邦人之義又安能
無言耶

蘇郡學志序

國家學校之設徧於海隅而蘇學獨名天下於是吾友
蔡君惟中始爲之誌惟中之言曰蘇學初自宋景祐魏
國文正范公割地爲之而安定胡先生實爲之師今去
二公五百餘年高風遺烈猶一日也且其地故爲吳越
廣陵王元璩之南園特幽且勝由今觀之大成之殿明
倫之堂尊經之閣高壯巨麗固已雄視他郡其間方池
旋浸突阜錯峙幽亭曲榭穹碑古刻原隰鱗次松檜森
鬱又他郡所無也況自宋以來科第往往取天下名

臣碩輔亦多發蹟于斯則其盛豈獨地哉夫物盛則必傳盛而不傳蓋有之矣則以無紀籍故也昔四代之學見於戴記魯之泮水詠於詩蜀之學官紀于史今吾學之盛於四代雖未敢望於魯於蜀豈遽出其下哉而紀籍獨闕昂誠不佞少游於茲窮搜細勘得其顛末彙為四卷間以示予予蓋與君同游于學者也嘉其志之勤且郡之文獻有足徵者故為序諸首惟繼是而司教有若安定者人才之出有若文正者吾且老矣尚當嗣君

書之

重刊左傳詳節序

春秋左傳詳節三十五卷宋魯齋朱申周翰注釋今董南畿學政黃侍御希武翻刻以示後學者也侍御以近世學者莫不為文而未知文之有法故刻示之予叙之曰文非道之所貴也而聖賢有不廢故冉牛閔子顏淵善言德行子夏子游以文學名孔子亦曰言之無文行而不遠而善鄭國之為詞命也則文豈可少哉學者不

為文則已如為文而無法法而不取諸古殆未可也左
氏疏春秋於聖人之旨未盡得也而載二百四十二年
列國諸侯征伐會盟朝聘宴饗名卿大夫往來詞命則
具焉其文蓋爛然矣於時若臧僖伯哀伯晏子子產叔
向叔孫豹之流尤所謂能言而可法者下是雖疆場之
臣亦善言焉有若展喜呂飴甥賓媚人解揚奮揚蹶由
方伎之賤亦善言焉有若史蘇梓慎裨竈蔡墨醫和緩
祝鮀師曠夷齊之遠亦善言焉有若鄭子駒支季札聲

子沈無成遂啓疆閨門之懿亦善言焉有若鄧曼穆姜
定姜僖負羈之妻叔向之母於戲其猶有先王之風乎
其詞婉而暢直而不肆深而不晦鍊而不煩繩削有若
剩焉而非贅也若遺焉而非欠也後之以文名家者孰
能遺之而為史者尤多法焉嘗竊論之邈得其奇固得
其雅韓得其富歐得其婉而皆赫然名于後世則左氏
之於文可知也已而世每病其誣蓋神怪妖祥夢卜識
兆誠有類於誣者其亦沿舊史之失乎雖然古今不相

及又安知其果盡無也然予以獲麟而後文頗不類若
非左氏之筆焉豈後人續之邪未可知也若是者今多
從削蓋幾于醇且粹矣學者因是而求之為文之法盡
在是矣若夫究聖人筆削之旨以寓一王之法自當求
其全以進於經

瓜涇集序

瓜涇集者集通議大夫都察院右副都御史長洲徐公
之文也公與予同年進士而齒先於予時同年三百人

予獨善公且相約為古文詞志甚銳務追古作者為徒相與劇切倡和往來然公詞出予每詘焉自以為弗及也未幾公以水部分司山東之寧陽地辟務簡益肆力於學及官武選時吳文定公在翰林吳中名士皆集倡和益富而公出補外藩于淞于嶺南于湖襄最後以御史中丞巡撫齊魯所至不獨以政事稱而尤以文學著聞蓋著述滋富矣然予自是與公闊焉久不聞問弘治末公上疏謝政事予亦旋自內閣告歸迺復聚首吳中

追思往時之會蓋三十餘年矣當時社友幾其存者其
存而復會於茲獨公與予也亦且老矣寧復往時意氣
之盛然公遇事感觸必有作作必以示予顧予學殖荒
落不復能一一追和與之上下其議論也而以為恨近
世士爭治文詞以干科第既得第則遂棄去如弁髦蓋
以時之進退升絀不在是焉耳公雖老矣而好學不倦
彌篤其出於天性者哉固宜其所得之深且邃也而何
可使其無傳焉故公之門下士與弟季止哀類其詩若

文得若干卷刻之而予爲之序公名源字仲山瓜涇其所家處也

贈謝封君序

昔元自沙漠入有中夏一時義士多不願為之臣若文山疊山二公精忠大節百挫不回尤炳耀於兩間予少讀二公集偉其詞壯其節思識其子孫然自元百年間於謝獨未有見焉頗聞謝之先家弋陽深山長谷風氣完固有山泉禽魚之樂橘包竹箭之饒自足而不願乎

外邪將猶抱前人之志義不帝秦者邪明興百餘年至
今封君始欲自試於時然七舉不第晚判桂陽仕亦不
達子琛始擢甲科拜監察御史卓然能舉其職於是桂
陽進封監察御史琛旋進淞江副按察使持節吳中水
利諸軍事謝氏至是始顯矣大凡物之晦也久其發也
必光木悴於秋華於春水涸於冬溢於夏謝自晉太傅
獻武康樂高標雅韻輝映江左涉五季而晦至宋則又
顯涉元而晦至我朝則又顯出處之際蓋合矣封君始

判桂陽實有遺愛於民憲副來位南服勤於吏事而庶政具脩嚴於風裁而貪猾斂避傳云公侯之子孫必復其始吾見謝氏之光昭前人又將自今始矣

重刊唐六典序

昔在孝宗詔修會典臣鑒與有職競焉竊伏自念蒐一代之制著之簡冊以為後法固非謏薄之所堪任思得古之作者師焉庶體裁有則而本末不紊三代之制莫盛於周周禮聖人作也未敢遽議周之後莫善於唐唐

有六典竊不自揆或可追而倣之而世無刻本間於中
秘得其書伏讀玩繹手錄以歸而議中格亦會遷官以
去乃藏之篋笥攷於今殆無所用之淞江按察使潼川
席君同文不知何自得之而意獨嘉焉捐俸命工刻之
蘇郡未竟陞任去繼其任者為嘉魚李君立卿實成之
且以序屬鑒曰六典自公而傳非公則誰序者鑒曰國
家官制則象周官於唐制固若未暇而亦未嘗遺之盖
唐以中書門下尚書三省叅領天下之務今六部雖分

顧猶尚書省之舊而內閣則隱然中書通政給事則門下之遺也其餘寺監府院以分衆職品爵勲階以叙羣材尚多唐舊則居其官攷其職謂無所用於今可乎且非獨唐也唐虞而下損益沿革咸具焉昔宋祁論唐制精密簡要曾鞏謂六典得建官制理之方文不煩而實備蓋開元中張九齡輩為之其書何可以不傳則未知後有作者亦將有取於斯乎而二君子惓惓翻刻意亦有在於斯乎

游名山記引

吾少也有四方之志思欲如司馬子長縱游天下以大
吾觀及官侍從地近職親雖燕南諸山未獲數至焉今
茲告歸謂可如志而耄及之雖吳中諸山未及徧游焉
靜言思之蓋未嘗不以為嘆玄敬乃能以使事聘四方
翫月終南之顛過首陽挹夷齊之高風登華山弔希夷
蛻函登嵩山憇少林寺濯驪山溫泉入王屋扣司馬子
微之扃三門砥柱龍門伊闕皆極天下壯觀近如兩京

畿甸諸山皆遐探邃討搜奇抉怪而又能以文字發之
讀名山記雖不識其地若身至其地者可謂善游而能
言者矣然吾與玄敬約如天之福假我以年吾方與子
北游長江觀廬山瀑布浮沅湘上岳陽樓望衡岳窺瞿
塘三峽歷劔閣岷峨入關中覽秦漢故都還登泰岱慨
想七十二君之遺封南出武林觀淞江潮上會稽探禹
穴佇子陵釣臺歷天台雁蕩至武夷歎羅浮上韶石望
蒼梧九疑而還子肯從吾游乎雖然太湖有山焉是為

洞天福地願子先之

春秋詞命引

予讀左傳愛其文而尤愛其詞命當春秋時諸侯大夫

朝聘宴饗征伐會盟類以微言相感觸其詞命往來亦

皆婉而切

若魯羽父請薛侯晉陰飴甥
對秦穆公知罃對楚共王

簡而莊

若臧文仲對王

使周景王責
晉人爭閭田

巽而直

若鄭人告楚將服于晉子產對晉
問入陳對士文伯壞垣游吉對楚

使雖或發于感憤然猶壯而不激

若晉狐突對懷公解
揚對楚子太叔儀對

衛獻公

屈而不撓

若展喜對齊侯吳駟由
對楚子齊國佐對晉

詞窮矣然且文

馬遁而飾

若王子伯駢告晉王子朝告諸侯

偽而恭

若鮑叔告魯請管仲伯州

犁對鄭子羽楚

誣而近正

若晉呂相絕秦叔魚歸季孫

於戲何其善

於詞也其猶有先王之遺風乎予生謇訥甚思所以變其氣質而無由因彙稗其詞而日諷焉庶有益乎孔子曰不學詩無以言讀此編者亦可以有言矣

震澤集卷十三

欽定四庫全書

集部

震澤集卷十四

詳校官中書_臣瞿照

中書_臣劉源溥覆勘

總校官進士_臣朱鈐

校對官編修_臣盧遂

謄錄監生_臣潘河

欽定四庫全書

震澤集卷十四

明 王鏊 撰

序

說附

贈鴻臚卿毛公序

貞甫將之南京鴻臚卿之任人或曰吾聞君子出有爲
出處有爲處正德初元朝埜救寧環齊魯之疆無狗吠
之警公於時未見有不合也而毅然以歸今之時似非
昔之時也自逆瑾構亂大盜起齊楚趙魏間蔓延吳楚

蜀與江西相煽繼作邊兵亦乘時入雲中甘涼自是公
私殫屈中外蕭然疲敝此范文子之所深憂賈誼之所
太息者也而幡然以往出處之際固如是乎誠世之所
未喻也而予獨知之臧文仲之言曰賢者急病而讓夷
夫君子抱負所有亦欲少試以自見於天下豈忍泯泯
沒沒自同於木石哉顧時方無事衆皆競進寧退而就
閒時或多虞世復我以又安敢以自佚公素負濟時之
略縮手傍觀鬱而不得施者久矣當今急才之際用人

者安能遺之公亦安能晏然終堅卧不起耶公行矣懋
建勲業以佐明時無若深源之負素望也其必若謝安
石乎若予則甘老林下矣

嘉善志序

設官分治古也略而今也詳吳粵於秦漢皆會稽郡已
乃別爲吳郡已又析爲嘉興爲松江而嘉興近又析爲
嘉善設官分治斯不亦日以詳乎夫山川土田古今非
有異也而風氣日開戶口日滋貢稅日增人才日盛則

其建置不得不日詳以密建置日密則其有離合損益升降盛衰亦安可無紀無紀則後世曷以考乎此倪君公在嘉善縣志所以作也君登戊辰進士給事門下華且要矣俄左遷而爲丞茲邑適振武張君煥知縣事推誠相與乃共立法更化嚴保甲之法厲魚鹽之禁毀淫祠設義冢立社學又立清風院以崇往哲又以其間成斯志昔之爲丞者嫌不可否文書行漫不知何事君以諫官左遷不少挫抑乃更奮勵勇於自立異乎古之丞

而張君又能同心相任以成其美予於斯志既有感乎
古今設官之異又嘉二君之為也因附書之

金山衛志序

國家武備之設西北最重東南若無事焉然而海島諸
國乘潮出沒瀕海之民時被毒螫國初蓋常患之因命
安慶侯即華亭之篠館築城置戍城成隱然與海中金
山相直故名金山衛相傳昔周康王東遊築城鎮海其
後宋武帝吳越王鏐皆嘗城之其地西抵浙之海寧北

抵吳淞江東南際大海而襟帶淮南諸郡朝命揚州等處備倭摠兵每駐節焉自宣德至今百餘年間島夷晏然雖巨盜間作旋亦授首非以守禦得人故耶正德某年張君文光以都指揮僉事來莅其任久之政平盜息乃曰今郡縣各有誌衛乃獨無茲衛東南巨障事多可書而世無聞焉使後世有祀宋無徵之歎吾恥之乃咨詢故老蒐輯異聞得遺事若干彙為六卷予得而閱之則古今沿革升降與夫城池之卑高場堡之遠近烽堠

之疎密儲峙之盈虧行伍之羸縮操閱之勤惰屯田之
蕪墾將校之賢愚勇怯皆可考而知則斯誌也謂為無
益可乎後世蓋將有徵焉文光武臣而能以廉自將且
汲汲於文事可謂知所重矣予故為序諸首

容春堂文集序

文之製大率有二典重而嚴敷腴而暢文如韓柳可謂
嚴矣其末也流而為晦甚則艱蹇鉤棘聱牙而難入文
至歐蘇可謂暢矣其末也流而為弱甚則熟爛萎蕸冗

長而不足觀蓋非四子者過學之者過也學之患不得其法得其法則開闔操縱惟意所之嚴而不晦也暢而不浮也文而至是是可以入作者之室矣董南畿學政侍御張君手一編授予曰是為戶部侍郎無錫邵公之文龍山蓋嘗師焉將梓刻以傳唯先生序之初予承乏翰林北上公時始得解過余舟中出所著示予固以超然脫去凡近其後予官于朝公亦敍歷中外恨不能即而友之亦未克沃而忘之也今茲予告歸公亦歸卧無

錫地孔邇而亦不能朝夕數數獨時得詩讀之體裁簡
重興寄間遠未嘗不改容欽歎而患不可多致今乃得
其全觀之知公之用力於斯也久其志直欲追古人而
並之不爲近世之詞而已也是足以傳矣或問公文馬
師曰是非予所及知雖然公蓋師韓而不暇及乎其他
者也其古歌詩蓋有晉魏之風焉而亦有不似者何師
其意不師其詞此固韓公語也師韓而不必似韓此善
學韓者也所謂嚴而不晦者也公年未及懸車當朝廷

渴賢之日公將復起大見功業不徒托之文章而文章之出將日富以深又非予所能涯者姑以是題其首併復侍御君何如也

重刊王逸註楚詞序

楚詞十七卷漢中壘校尉劉向編集校書郎王逸章句其書本吳郡文學黃勉之所蓄長洲尹左綿高君公次見而異之相與校正梓刻以傳自考亭之註行世不復知有是書矣余間於文選窺見一二思覩其全未得也

何幸一旦得而讀之人或曰六經之學至朱子而大明
漢唐註疏爲之盡廢復何以是編爲哉余嘗即二書而
參閱之逸之註訓詁爲詳朱子始疏以詩之六義援據
博義理精誠有非逸之所及者然予之憊也若天問招
冤謫怪奇澁讀之多所未解及得是編恍然若有開於
予心則逸也豈可謂無一日之長哉章決句斷事事可
曉亦逸之所自許也予因思之朱子之註此詞豈盡朱
子說哉無亦因逸之說參訂而折衷之逸之註亦豈盡

逸之說哉無亦因諸家之說會粹而成之蓋自淮南王
安班固賈逵之屬轉相傳授其來遠矣則註疏之學亦
何可盡廢哉若乃隨世所尚猥以不誦絕之此自拘儒
曲士之所爲非所望於博雅君子也其七諫九懷九歎
九思雖詞有高下以其古也因亦不廢雖然古道之涸
沒于今獨是編也乎哉孰能追而存之

申鑒註序

申鑒五卷漢荀悅著悅仕獻帝朝辟曹操府與孔融及

弟或同侍講禁中悅每懷獻替而意有未盡此申鑒所
爲作蓋有志於經世者也然當時政體頗有大於總攬
機務使權不下移者乎而曾無一言及之厥後融以論
建漸廣或以不阿九錫皆不得其死悅獨優游以壽終
其亦善處濁世者矣其論政體無賈誼之經制而近於
醇無劉向之憤激而長於諷其雜言等篇頗似揚雄法
言雄不免曲意美新而悅無一言及於操視雄爲優矣
或言悅書似徐幹王符考其歸茲若人之儔乎吾未知

所先後也而三品之說昌黎公有取焉其書世有罕見
吾蘇黃勉之好蓄異書又爲之訓釋搜討磔裂出入經
史春秋內外傳老莊淮南素問天官地志博洽精密多
得悅旨雖然悅之書其有所感而爲之乎勉之之註豈
亦有所感而爲之乎勉之春秋方富行將以其學出而
效用當炳焉赫焉流聲於明時尚何悅之慕哉

皇甫持正集序

昔孫可之自稱爲文得昌黎心法而其傳實出皇甫持

正今觀持正可之集皆自鑄偉詞槎牙突兀或不能句
其快語若天心月脇鯨鏗春麗至是歸工挾經執聖皆
前人所不能道後人所不能至也亦奇甚矣昌黎嘗言
惟古於詞必已出又論文貴自樹立不蹈襲前人不取
悅今世此固持正之所從授與他日乃謂李翱張籍從
余學文頗有得從吾游者李翱張籍其尤也而不及持
正何歟余謂昌黎爲文變化不可端倪持正得其奇翱
與籍得其正而翱又得其態合三子一之庶幾其具體

乎則持正可之之文亦豈可少哉予旣刻可之文而持正未遑今世庸乃能嗣吾志而梓之予嘉其仕優而不忘學又不忘其世裔之所從出也爲序其端

送袁山人序

有爲青烏之學者袁子來自宣城爲余卜壽藏於洞庭之陰行三日得之圖以示余曰是爲氣之來氣之止是爲開闔是爲衛護是爲蜂腰鶴膝爲蟬翼爲蝦鬚爲旗鼓爲印爲金魚袋蓋全氣之地也余曰一氣磅礴流行

兩間子獨何以得之曰氣無形因形以見勢之所起氣隨而始勢之所終氣隨而鍾吾原其起乘其止審其廢擇其相避其害非有天星地卦之說也曰吾聞尋龍易定穴難子獨何以定之曰余以倒杖之法定之何以爲倒杖也曰公劉之詩不云既景乃罔又曰景山與京周禮匠人樹八尺之槲度日出日入之景以定東西又叅日中之景以正南北此吾倒杖法之所從出也夫氣之來也有俯仰正仄緩急强弱逆順吾以杖法迎之逆取其

順順取其逆聚取其散散取其就急取其緩緩取其急
浮沉吞吐加減饒借依法裁之毫髮不爽此杖法之妙
也昔者楊筠松有七十二杖法廖禹有四例八杖劉氏
有十二杖予為天綱後人得家傳之秘遂合三家之法
而一之識者觀之卦例之說可遂廢矣乎故曰既明倒
杖之法方知卦例之非予曰人生受命于天乎受命于
地乎受命于天卦例之說非也子之法豈能遂易之曰
非所知也奪神功改天命吾聞之郭景純而景純亦莫

之逃也語云穴本天成福由心造則又存乎其人君名
德字宗善號松月云

送工部正郎蔣君掄材還朝序

正德九年正月乾清宮災皇帝若曰於乎惟天全付所
覆於皇明行祉承慶在予一人茲予未知獲戾於上下
天降之災怵惕惟厲思免厥愆唯是先皇內朝所以基
宥密者予安敢不祗復乃命官采材於四方於蜀於黔
於湖湘命大臣往統之於閩於粵於江右又命官分理

惟巨材之生多遐荒絕徼梯巖凌壑無翼而至董是役者緩之則急急之則怨不急不怨材克用集而民忘其勞若蔣君舜臣之于閩浙其庶乎君且還朝嚴州通守薛君昂遠走使求予言爲贈昂余故人也不能辭余聞之天有三垣天子象之外朝象天市也治朝象太微也內朝象紫微也其亦重矣今天心仁愛薄示厥微上下協力遂克奏成而蔣君預有其功斯亦偉夫余因是有感矣梗楠豫章礪砢千尋之名材老於大山長谷其亦

何心於世用也一旦遭時之需遂起爲清廟明堂之用
輪囷金碧與赫無窮不知人之遇乎材耶材之遇乎人
耶雖然大山長谷之中有所謂賢才者焉厥材礪礪可
以柱明堂梁清廟者多矣將誰使収之余因薛君之請
遂書以爲使歸之獻

東萊滕氏族譜序

人之生也必有所始不可不知也而世次漫衍支分派
別亦不可得而盡知也於乎昔之不紀今無以據今之

不紀後將奚傳吾恐後之不知今亦如今之不知古也
此譜之所以不可無也子夏曰禽獸知母而不知父野
人曰父母何算焉都邑之士則知尊禰矣大夫學士則
知尊祖矣夫所貴乎學士大夫者非以其能知所自出
乎不然與禽庶奚擇焉知鎮江府東萊滕侯謚出其族
譜二冊授予曰吾家本汴人宋靖康間始祖以武功大
夫佐定海因家焉後又徙東萊載其聲光世有聞人今
自十五世合爲一圖蓋大宗之法也又五世各爲一圖

小宗之遺也願公序之以示我之後人使無賈隊謚之望也滕之光也自周衰而宗法廢尊祖合族之義不行矣唐亡而譜牒廢尊祖合族之義不明矣金元以來文獻蕩然無遺人質質焉莫知身之所自出於斯時也有能紀載先世而不迷其所自出若滕氏乎固君子之所深嘉而屢歎者也吾又安能已于言哉然吾聞滕之世遠有代緒文王之子叔繡始封於滕所謂郕雍曹滕者也漢明帝朝有九江都尉撫三國時有丹陽太守肩宋

有中正元發宗諒皆名臣宗諒范文正公所爲誌其墓者也誌稱宗諒河南人非與東萊同所出乎而可遺耶又有諱茂實者靖康之變繫於金首可斬冠不可易有諱膺者方臘之亂身可殺城不可破其精忠大節耿然天地間若是者所宜大書特書爲茲譜重而侯爲政京口政聲流聞亦當嗣書之後之人有善焉亦當嗣書之將不一書而已也然則中原文獻之傳其不在茲乎不在茲乎

雲水詩集序

雲在天水在淵其相去不知幾千萬里也雲在天曾無
意於水水在淵曾無意於雲而雲水之相遭也溶溶汙
汙鄰鄰困困浩盪推移升降浮沉或合或分或吐或吞
吾不知雲之爲水耶水之爲雲耶雲與水爲一耶爲二
耶無錫華某生而好道清癯鮮潔凡世人之名場利苑
愛河慾海皆不能染焉棄其妻子來林屋山中獨居三
十餘年往來興福寺博叅內典人疑其爲僧而非僧也

酷嗜參同契悟真篇默坐內視求長生不死之法人疑其爲仙而非仙也時亦不能忘情作爲歌詩蓋無意於言不能不言而自成其言人疑其爲詩人而非詩人也雖予亦疑之曰其殆匡章之流乎間嘗與之游久之出一編以示余曰雲水集余讀之數過曰其雲水道人耶然吾有問焉雲與水相忘而相合者也心者其水耶水靜則明物者其雲耶雲過則空空生明耶明生空耶參同契之言曰原本隱明內照形軀三光陸沈溫養子珠

髣髴大淵乍沉乍浮若是者其亦雲水相遇之謂耶雲
水道人必能爲我言之詩凡若干首

愧知說

古之君子其於人患不知也知之患不在其位也苟知
其人在其位則不患不能行矣故鮑叔用則舉管仲王
陽用則舉貢禹龔勝用則舉龔舍蓋唯其賢而已人不
曰其友也以爲疑已不曰吾友也以爲嫌甚者其姪其
子亦無不可舉當是時豈直無法耶後世道衰人不能

自信上之人亦不信人而信法操縱闔關要皆如法而止是故見賢焉有不得舉見不賢焉有不得去舉於禮部者探策而求選於吏部者貫魚而進或於法外焉稍出意見則人且議之而夫人者亦自以爲嫌而不敢出其意見有一日之長焉雖知其不肖不得而遺也有一日之拙焉雖知其才且賢不得而取也曰法也非我也於戲豈不過甚矣哉所謂法者豈不欲得人乎而若是焉何哉吳君鳴翰少與予同學其詩篇字畫有晉唐之

風其文非近世之所謂時文也予謂空冀北之羣非君
耶壬子秋予主試應天殫心竭力於時之才自以無失
也揭榜而君名不預於戲永叔之於劉暉子瞻之於李
躬去取之間果有非人力所及者其將謂之何哉然君
不以是臯予其意曰有法焉非子之過予之所以自解
者亦曰有法焉非予過也而平日所謂知者何如哉君
之才固非久湮於下將必有識者焉揜而拔之而予於
此莫知所以爲贈也獨自識其愧如此

鐵柯說

都察院右僉都御史劉公與清初爲御史或贈之古印章曰鐵柯公因以自號人皆呼爲鐵柯而莫知其義也予蓋知之因爲之說鐵柯者何御史中丞劉公所以自況也曷爲以鐵柯自況王者遣將親授之斧御史出巡衣繡持斧斧以斬伐柯其柄也詩云伐柯伐柯其則不遠柯木爲之云鐵柯者何爲其勁也斧以斬伐利莫加焉柯鐵爲之勁莫加焉利與勁合殆純乎剛者也公蓋

於此比德焉君子依乎中庸不爲己甚何賢乎剛而取
之剛爲陽爲明爲正爲果決柔爲陰爲闇爲佞爲退縮
剛柔雖並用世之柔者比肩剛者不一見也則剛其難
乎故獨取於剛也言不剛則囁嚅行不剛則縮朒氣不
剛則萎蘼亦何以當大任任大事哉故曰剛毅木訥近
仁又曰吾未見剛者然則公之所以比德者何公蓋以
風裁自持希古所謂剛者焉故以是贈之也而吾所以
贈之者異於是吾所以贈之者何曰高明柔克沉潛剛

克

王良貴字說

崑山王君用虔名其子曰良貴予爲字曰邦譽告之曰
今夫舉世之所以汲汲於求貴者何哉貴誠有異焉耳
簪纓冠冕飾於首者異也帶裳黼黻飾於躬者異也府
寺臺閣其居第異也輿從呵護其儀衛異也怒刑喜賞
其權力異也若夫所謂良貴者則何異哉是故舉世營
營唯貴之爭而亦有孰知有良貴者乎乃翁獨以良貴

名若所思有非夷者矣雖然若亦知良貴之有異乎仁
義足乎心發乎言語溢於顏面達於肩背手足而聲譽
施於人粹如也蔚如也如斯而已其亦有異乎無異乎
顧人弗察焉耳有察焉其能以此而易彼乎是所謂以
道充爲貴也於世所謂貴其將有弗願矣乎而亦有不
得辭者孟子曰修天爵則人爵從之

吳奭字嗣盛說

天官少宰吳公名其冢子曰奭字書奭盛也詩曰路車

有奭又曰韎韐有奭予因告之曰物莫不期於盛而盛者每難乎其繼雖然亦存乎其人焉世之所謂盛者非祿位勲業之謂乎漢之時有若韋氏平氏俱父子宰相楊氏袁氏桓氏或四世五公或四世太尉或父子兄弟代爲帝師唐蕭氏宋韓氏呂氏皆以相業世其家何其盛且能繼也將必有道乎故曰存乎其人焉少宰以文章德行重一時可謂盛矣奭溫然緼藉遜志敏學其殆能繼乎予不能無望也昌黎公云莫爲之前雖美弗彰

莫爲之後雖盛弗傳故因其名稱其材重其望字之曰嗣盛

樂全說

王子歸自內閣日消搖乎洞庭之野名山福地無弗登也澄波激湍無弗泳也懸崖怪石無弗題也有進而問者曰子何樂於是與始子之居廊廟也翱翔乎紫微陟降乎文陛一人眴之百僚師之四海睎之而子感感乎其若憂今之歸也窮山荒野木石之與隣鹿豕之與侶

而子超超焉其若有樂也子何樂於是歟王子曰若欲知吾之樂乎吾之樂吾不能知若又安能知之吾不能自言又安能爲若言之雖然試語其概莊周氏之言曰樂全之謂得志所謂全者孰全哉全天乎全人乎全人者有所樂而樂之者也全天者無所樂而樂之者也全人者得則喜失則悲全天者不然貧亦樂富亦樂出亦樂處亦樂無入而不自得焉無入而不自樂也是故觀於天見日月星辰煙雲風雨霜露之變山嶽之峨江湖

之流樂也觀於人見衣冠宮室城池庠序獻酬登降絃
誦歌詠樂也觀於物見草木之榮悴開謝鳥獸之鳴嘯
魚龍之飛泳樂也然其樂果在是乎簞瓢陋巷顏子之
樂也有不在簞瓢陋巷者浴沂舞雩曾皙之樂也有不
在浴沂舞雩者然則顏曾之樂可得而言乎吾不得而
言也非唯吾不得而言雖顏曾亦不得而言也夫是之
謂至樂而豈外物之謂哉故曰古之所謂得志者非軒
冕之謂也自夫人者以軒冕爲樂夫以軒冕爲樂則必

以軒冕爲憂而又何樂乎吾之樂雖未及乎顏曾則非
軒冕之謂也又非山水非風月花鳥之謂也日洋洋焉
踴躍焉俯仰乎宇宙之內不知天地之有我我之有身
也身之有心也不知果樂歟非樂歟果全歟非全歟問
者曰是非吾所及知也試問諸顏曾氏

森甥字說

予妹歸南濠葉元在氏有子甫二歲問名於予予爲名
曰森何以謂之森也子不見夫種樹者乎其始生也閑

以重藩培以沃壤漬以甘泉則其木森然長茂矣予欲
爾子之長茂也故名及予乞告復歸自翰林森則頎然
玉立且將冠矣問字於予予爲字曰君玉何以謂之玉
也予不見夫種樹者乎其既盛也鼓之以雨風飽之以
霜雪磨之以歲月則挺然剛勁矣吾欲爾子之剛且勁
也故字森乎吾願爾以仁培之以禮閑之以詩書漬之
鼓之以聲華飽之以世故磨之以事業厚其積以希其
光大其器以充其受則明堂廣廈之構將不能舍子而

他求矣

澹菴說

歛之潛川有人焉春秋八十而有童孺之色人異之曰
翁其有道者耶翁曰吾野人也何道之有雖然有一焉
語云非澹泊無以明志故吾於澹未嘗一日忘焉今吾
之壽也亦唯於澹焉得之子亦知人之有心乎心者神
明之舍中不容物而夫人者醖於滋味醖於聲色醖於
貨利與名於是乎得也失也是也非也利也害也紛焉

自外以入於是乎憂也喜也怒也懼也愛也惡也紛焉
由中以出出入爲構日與心鬪而心憧焉悴焉而弗寧
夫心猶水也撓之則沸沸則神去汨之則濁濁則明去
神明去而身從之吾於是一切澹焉交物於前而不留
是故吾視之若無視也聽之若無聽也事之若無事也
吾日與物接而吾心湛焉不動不動則清清則明明則
久而不衰是故能壽也吾又何道之有君子曰翁其善
養心者耶故爲說而傳之翁汪姓相其名

震澤集卷十四

欽定四庫全書

震澤集卷十五

明 王鏊 撰

記

五湖記

吳郡之西南有巨浸焉廣三萬六千頃中有山七十二
襟帶三州

蘇湖常也

東南諸水皆歸焉其最大者二一自寧

國建康等處入溧陽迤邐至長塘湖并潤州金壇延陵

丹陽諸水會於宜興以入

今寧國建康之水不由此矣

一自宣歙天目

諸山下杭之臨安餘杭湖之安吉武康長興以入而皆由吳江分流以入海一名震澤書所謂震澤底定是也一名具區周禮職方揚州之藪曰具區山海經浮玉之山北望具區是也一名笠澤左傳越伐吳吳子禦之笠澤是也一名五湖范蠡乘舟出五湖口太史公登姑蘇望五湖是也五湖者張勃吳錄云周行五百里故名虞仲翔云太湖東通長洲松江南通烏程霅溪西通義興荆溪北通晉陵潞湖東連嘉興非溪水凡五道故謂之

五湖陸魯望云太湖上稟咸池五車之氣故一水五名
然今湖中亦自有五湖曰菱湖莫湖游湖貢湖胥湖莫
釐之東周三十餘里曰菱湖其西北周五十里曰莫湖
長山之東周五十里曰游湖沿無錫老岸周一百九十
里曰貢湖胥山之西南周六十里曰胥湖五湖之外又
有三小湖夫椒山東曰梅梁湖杜圻之西魚查之東曰
金鼎湖林屋之東曰東臯里湖而吳人稱謂則惟曰太
湖云

七十二峯記

太湖之山發自天目邈迤至宜興入太湖融爲諸山湖之西北爲山十有四馬跡最大又東爲山四十有一西洞庭最大又東爲山十有七東洞庭最大馬跡兩洞庭望之渺然如世外卽之茂林平野閭巷井舍仙宮梵宇星布綦列馬跡之北津里夫椒爲大夫差敗越處也西洞庭之東北渡渚鼇山橫山陰山葉余長沙山爲大長沙之西衡山漫山爲大東洞庭之東武山北則餘山西

南三山厥山澤山爲大此其上亦有居人數百家或數十家馬跡兩洞庭分峙湖中其餘諸山或遠或近若浮若沉隱見出沒於波濤之間馬跡之西北有若積錢者曰錢堆稍東曰大屺小屺與錫山若連而斷舟行其中曰獨山有若二鳬相向者曰東鴨西鴨中爲三峯稍南大墮小墮與夫椒相對而差小爲小椒爲杜圻范蠡所嘗止也西洞庭之北貢湖中有兩山相近曰大貢小貢有若五星聚曰五石浮曰茆浮曰思夫山有若兩鳥飛

且止者曰南烏北烏其西兩山南北相對而不相見見
即有風雷之異曰大雷小雷橫山之東曰千山紹山曰
瞳浮曰東獄西獄世傳吳王於此置男女二獄也其前
爲粥山云吳王飼囚者也有若琴者曰琴山若杵杵山
曰大竹小竹與衝山近若物浮水面可見者曰長浮瀨
頭浮殿前浮與龜山相對而差小者爲龜山有二女娟
好相對曰謝姑有若立柱截薛玉柱稍却金庭其南爲
峻山爲歷耳中高而旁下者筆格驤首若逝者石蛇有

若老人立石公石虵石公石最奇與龜山龜山南北相對曰鼉山旁曰小鼉若螺者青浮二鼉之間若隱若見曰驚籃東洞庭之南首銳而末岐者曰箭浮若屋歇者曰王舍浮芡浮又南爲白浮澤厥之間有若笠浮水面者曰蒹帽有逸於前後追而及之者曰貓鼠有若碑碣橫者曰石牌是爲七十二然其最大而名者兩洞庭也

登莫釐峯記

兩洞庭分峙太湖中其峯之最高者西曰縹緲東曰莫

釐皆斗起層波矗逼霄漢可望而不可即成化戊戌予
歸自翰林文吳縣天爵過予於山中相與窮溪山之勝
行至法海仰見異峯寺僧進曰是所謂莫釐者也文振
衣以升衆皆繼之或後或先或喘或顛至乎絕頂而休
焉天若爲之寬地若爲之闢西望吳興渺瀰一白有若
雲焉隱見天末或曰卞山也北望姑蘇橫金一帶人家
歷歷可數有浮屠亭亭曰靈巖上方也東望吳江雲水
明麗帆影出没若有若無蓋七十二峯之麗三萬六千

頃之奇皆一覽而在曰大哉觀乎相與席地行觴踞石
賦詩久之暝色四合微月破林湖光瀕洞崖壑黯黮迺
相與循舊路而歸焉語有之不登高山者不知天之高
也不臨深溪不知地之厚也莫釐猶爾况所謂泰岱恒
華者哉予以是知學之無窮也故記之

靜觀樓記

太湖之山七十二其最大者兩洞庭兩洞庭分峙湖心
望之渺渺忽忽與波升降若道家所謂方壺員嶠者湖

山之勝於是爲最樓在山之下湖之上又盡得湖山之勝焉山自莫釐起伏邈迤有若巨象奔逸驤首還顧遂分爲二一轉而南爲寒山鬱然深秀樓枕其坳一轉而北復起雙峯亭亭如蓋末如長蛇夭矯蜿蜒西逝西洞庭偃然如屏障列其前湖中諸山或遠或近出沒於波濤之間烟霏開合頃刻萬狀登斯樓也亦可謂天下之奇矣自昔臨觀之美莫若滕王閣岳陽樓以彭蠡岳陽之廣也然二湖所見廬山五阜而已君山一峯而已若

夫三萬六千頃之波濤七十二峯之蒼翠有若是之勝者乎有若是樓之兼得者乎語有之知者樂水仁者樂山吾雖未及乎仁知而於山水則若有宿契焉心誠樂之而患其難值也迺於是樓焉得之又幸其不界于通都要津適值予故土予得專而有之豈天設地造特以為拙者之適靜中之觀乎故名其樓曰靜觀而為之記

黃公山釣臺記

弘治壬子嘉魚李世卿考室乎黃山之陰廣東陳白沙

先生題之曰黃公山釣臺有詣世卿而問焉曰何哉君所釣者果在魚乎昔太公釣而得文王子陵釣而得光武子之釣豈類是乎世卿曰吾所釣者非緇非竿非鮪非鱸終日釣焉無所釣也是吾之釣也餌且不設而何有於魚魚且不存而何有於名與利於是其伯氏茂卿方爲大理寺副曰盍歸乎吾將釣乎黃公之山遂解官去天下之士聞而高之頃年白沙以德義文學警動海內天子虛已召焉至則授以侍從中外動色以觀其所

爲而白沙終去不顧世卿徒步萬里徃從之游不復肯
舉進士茂卿舉進士官大理甫三歲竟去豈白沙之門
則必以不仕爲高乎賢者出處固非世俗之所能知哉
予又安能言之予獨患世之紛紛奔利死名莫知還返
而夫人獨超然物外揚子云鴻飛冥冥弋者何慕焉賈
子云鳳縹縹而高逝兮夫固自引而遠去於戲吾安得
從斯人者游乎姑爲記於臺上

黃陵岡水神祠記

中國之水河最大其汎濫潰溢所至郊隧園田官亭民舍盡爲洪流所去則洪流復爲平陸若有神焉司之故諺謂之神水漢人亦云江河之決皆天事非由人力昔禹治水不成過衡山夢滄水使者授金簡玉字之書過會稽夢人衣玄纁告以石函之文其事頗不經然書云天迺錫禹洪範九疇易曰河出圖洛出書蓋聖人之誠上通於天天迺祐之其動乎思慮發乎夢寐固若有相之者歟其亦有神爲之邪而可謂之誣哉弘治二年河

決張秋漕道幾壞華容劉公大夏以都察院右副都御史奉命治之公往來充豫間相厥源委謂黃陵岡爲張秋上流而滎澤之孫家渡又爲黃陵岡上流迺檄張僉事龔朱叅政瑄發卒治之時張秋再決水勢稽天上下皇皇莫知所出公方有事黃陵岡夜夢婦人冠珮默坐跣其一足明日語諸屬龔曰水神見像役其成矣公曰果然者當立廟以祀已而上命御馬監太監李興平江伯陳銳同來蒞事興治張秋銳治黃陵岡大夏治孫家

渡鼎與都指揮僉事劉勝治荊隆口俱以八年正月始
事上奮下勵決旬諸口悉合河復故道漕運無虞上下晏
然河平之月日有詔建祠于安平鎮祀龍王於黃陵岡
而鼎等復以水神見像報不可忘迺復以餘財建祠若
干楹肖夢中之像以祀以答神休以卒公志而來請記
予以諸君朞月之間成此偉功國家大得天人之助有
不可誣者故撰次其槩使歸鑱諸石

吏部驗封司題名記

國家政務分理之任爲部有六曰吏曰戶曰禮曰兵曰刑曰工吏部分理之任爲司有四曰文選曰驗封曰稽勲曰考功驗封郎中一人員外郎一人主事一人其所專理一曰王府將軍郡主駙馬儀賓之誥二曰番僧國師禪師之誥三曰內外文職褒封之等四曰公侯伯贈官之等五曰兩京堂上贈官之等六曰散官給授之等七曰土官承襲之等八曰掾史出身之等國初莅是職者凡若干人永樂後遷都於茲則南北並設居是職者

又若干人姓名雖在日遠日湮於是山東劉君約爲郎中始謀刻之石而請予記蓋國朝以周六典建官而亦或因秦漢之舊秦有三署郎以其侍衛居中故曰郎中漢選三署郎初入尚書臺者稱郎中宋百官階次有員外郎隋開皇六年尚書二十四司各置員外郎謂曹郎本員之外復置郎也漢光祿勳有南北廬主事後魏諸曹各量事置掌故主事隋初諸臺並置主事令史然吏部郎於時選特妙其諸曹郎功高者始遷焉則其重也

久矣夫司之有碑所以載姓名紀事實崇往哲聳後觀而官之顛末沿革亦所當知也故具列焉若夫賢否勸懲法戒之意則覽者當自得之

保義堂記

少師兼太子太師吏部尚書華蓋殿大學士徐公置義田於陽羨之郊以贍徐宗祭有祠學有塾喪葬婚嫁有仰公喟然言曰於乎遠哉唯予宗日滋勢日以邈未之克合唯先府君實始有慕於范文正公不肖孤奉以周

旋四十餘年遭際聖明致位臺閣遂濟登茲唯皇恩之
隆先志之懿何敢忘焉然吾聞難合而易離者人難成
而易敗者事吾創之吾安能保之後之人不有隳吾約
者乎於是言於上關約部曹籍數郡邑使鄰無敢侵族
無敢訟主者無吝出分者無過取曰庶保吾義於無窮
故名其堂曰保義命醵記之以示後公之慮則周矣遠
矣然法者其以治愚乎不肖乎若公之後其必多賢乎
而何待於法哉其亦告之以義焉耳夫田以義名豈獨

贍其口體固將教之以義也今夫世之人自一命之爵
百金之產則必欲其子孫世守之曰前人之貽也至於
義不思所以保之保之何如亦唯心公之心焉耳公之
心吾能言之文正之言曰吾吳中宗族甚衆於吾固有
親疎然吾祖宗視之則無親疎也公之心文正之心乎
使傳之一世二世亦然曰均吾徐氏也十世百世亦然
曰均吾徐氏也如是雖傳至無窮其可乎而安有親與
疎親疎且無侵與訟安從生是足以保茲義於無窮矣

公曰然遂刻之壁眎後昆其有勸也

貴州鎮守公署記

弘治戊午冬十月貴州鎮守公署成初署直子城之西南隅負山瀕河河流湍激奔注屢築而圯旣費且勞歲丙辰某來鎮茲土始至庭除湫隘垣頽級夷則爲階曰凡吾之來以安人也身之不容人於何有爰覽境內得隙地曰東園剗阜爲夷端景相方或因或創經營未幾顯構巍然前爲鎮邊之廳以出令也中爲萬年之閣以

祝釐也後爲退食之堂以即安也馮高據顯山川獻妍
體勢巖巖頓改舊觀而人莫知費之所出予惟貴州古
荒服入國朝置同藩臬壤交夷夏戶錯軍氓莅茲土者
率以其民荒遠肆爲誅求莫知紀極名曰鎮之其實撓
之名曰撫之其實殘之故每大亂則豈獨民之罪哉
某乃能以家貨飲公役遂去卑卽高去圯卽安推是志
也以從諸政民其有弗靖者乎故碑之以規來者

安隱記

其跡仕也其心仕也安仕者也其跡隱也其心隱也安
隱者也一斯專斯樂樂斯安安斯久久斯不變有人
焉居廟堂而有江湖之志棲山林而有魏闕之思是其
能安乎能久且不變乎否也伯氏警之抱淳履素不樂
進取自稱安隱居士伯氏之言曰古之人胡爲而有隱
哉古之人抱負所有不屑自試或欲自試而時不我以
或時見用而獨於幾微有不合焉知時之不可爲也而
去之其下則飾奇眩俗身退志進是故有所負焉則隱

有所不合焉則隱有所希焉則隱若是者高矣奇矣其
亦有不足於心者乎而吾舉無焉太湖之濱洞庭之麓
有田數畝吾肆力而耕於是鑿其中以爲池疏其傍以
爲堤除其高以爲園園吾藝之橘池吾畜之魚堤吾種
之梅竹花柳吾誠於是安焉樂焉以終吾身吾於世非
有負也非有所希也非有所不合也譬吾之於隱也若
魚之在水不知其爲水鳥之在山林而忘其爲山林也
子以爲何如鑿曰兄之志高矣美矣弟又安能移之顧

弟涉世久思一息肩焉而未得他日將從兄而隱兄其許之乎

吳縣學射圃記

鄭侯璠治吳之三年聿新學宮闢隘抗卑直回正衮門
堂庭廡煥改舊觀而射圃仍在學之西偏湫隘偪仄下
無以周步武上無以崇揖讓侯甚病之一日謁文廟顧
瞻其東廡有町疇問之曰某氏之棄地也倍直償焉爰
始經營有操書致者曰吾長洲之氓某也而有地焉鄰

吳學宮敢因下執事獻諸歸之直不受於是得地衡五十弓縱百步乃始作亭曰觀射賓主有階抗侯設豐洗水篚縣莫不有所於是學諭李仁等來請記其事學之有射圃非曰不忘武備也蓋亦學焉而其禮廢久矣其儀雖具於儀禮顧未有舉行之者往時天台陳公選以御史董學政於吳始命兩生習之大江之西得其儀以還俾諸生歲時肄之鑿於是實備衆耦之末預觀周旋揖讓之盛于于翼翼似勞也而甚適也似迂也而甚莊

也問學之餘於是游焉息焉揖讓焉獨非學乎即有教慢怠惰之氣奚自入焉蓋非唯可以觀德也又可以養德焉故曰仁者如射又曰射有似乎君子今陳公去吳久鏊亦竊官於朝且三十季不知吳下諸校其射儀尚猶昔乎抑不能無異於昔者耶是亦人材風化之所由升降也故因射圃之成爲記於石而因以諗之

昭恩堂記

監察御史王君鼎莅官之三年有制父佐如子官母高

贈孺人君乃作堂於閩山之陽曰昭恩請予記其事以
示後予唯憲臣朝廷之耳目朝廷之重之也不唯其順
唯其拂憲臣之許國也不於其小於其大褒封之典非
其受之難也受而無愧是爲難矣若君其可謂無愧也
何以知其無愧也往者大臣有以罪罷復媚竈媒進者
物議譁然謂邪正之所由進退國家之所由安危而無
敢當先論列者獨君奮然草䟽數千言率同列上之其
命遂寢君子謂是舉也國是搖而復定直道屈而復信

君之功居多然中外猶有爲君危者及讀制詞乃知皇上之受盡言君之善進諫何其盛也君臣之難也直如朱雲不能去一張禹得君如陸贄不能沮一裴延齡故鰲有歎於今日之盛夫有施於下當其才之謂恩不然則濫有受於上稱其情之謂榮不然則倖若君之舉其足以昭恩命矣乎是所謂於其大者也是爲記


寶坻縣新城記

唯寶坻作固京畿控遏要衝縣故有城歲久而圯雉堞

就阨盜賊無禁弘治戊午武進莊侯禕以進士來知是
邑間行故壘喟曰殆非所以戒不虞示偉觀也於是始
謀重作之詢于邑人邑人僉同上于憲府憲府以俞侯
乃相方視阨程材葺工又勸民納粟冠帶得材若干旣
而巨室之寓是邑者咸願輸其財僚佐亦各分地受功
探石於山陶甃於野法嚴令一衆手競勸經始於弘治
庚申之四月迄辛酉夏孟而城立矣城之周若千里池
繞之而環貫乎城中城之門四門之上爲樓四隅爲角

樓作石堰於水以節流作浮梁於河以利涉城高而堅
池廣而深闔闢以時宵柝無警居者樂保其家行者樂
出其途於是邑之父老欣欣相告曰吾城無所保障民
臥不帖席者凡幾世矣前宰是邑者固亦屢嘗謀爲之
而績用弗成今賴我侯一旦睹其成而不預其勞功在
吾人其何可忘於是相率來京請予文其事於碑予謂
城之設以備患也然患而備不若無患而備之愈也先
王之世民相安於仁義禮樂之中而不識兵戈戰鬪之

事則何患之備乎然無患矣不以無患焉而遂莫之備也故城謝城朔方詠於詩城邢城楚丘書於春秋則城之作其可少乎而莊侯寶坻之役何可以不紀也憲府實唯巡撫順天右副都御史洪公鍾巨室則英國公某慶雲侯某



震澤集卷十五

欽定四庫全書

集部

震澤集卷十六

詳校官中書_臣瞿照

中書_臣劉源溥覆勘

總校官進士_臣朱鈐

校對官中書_臣李斯咏

謄錄監生_臣王爾熙

欽定四庫全書

震澤集卷十六

明 王鏊 撰

記

亳州營建記

亳故湯都今城東北一里而近有湯陵三十里而遙爲桑林之野桐宮穀熟往往而在其地春秋時爲譙邑秦漢而降或爲縣爲州爲郡爲軍爲國國初復爲縣隸河南之歸德洪武六年改隸鳳陽之潁州迄今百三十餘

年矣境大貨穰將強卒武非尊官無以鎮之弘治丁巳
廵撫都察院左副都御史當塗李公以聞詔陞毫爲州
時東魯王侯沂實來知州事始至喟曰茲維殷故都明
詔所陞進而規撫庠陋弗飾其何以稱乃鳩工聚材以
興壞起廢爲任先事學宮重新大成殿飾孔子及諸賢
像建明倫堂闢射圃繕黌舍已乃築郡厲壇于城之北
社稷壇于城之西風雲雷雨壇于城之南又作城隍廟
東西二十四司又以分司不足以貯使節乃建總司于

分司之東府館于州治之左又作預備倉若干連官廳
公廨各一然後曰吾亦有所休乎乃改作州治前堂後
寢左庫右廳東西吏舍又作二庫樓重門固鑄用戒不
虞經始丁巳之冬迄辛酉而落成焉敦學有次亨獻有
所賓至有歸食有高廩貨有深藏聽斷承委各有寧宇
其所建又皆高廣壯麗入其境巍然煥然毫非舊日之
毫矣其用人之力木石瓦甍之費至百千萬役亦大矣
而治之有法故財雖費莫知所從出行之有漸故力雖

勤莫知其勞也侯於是可謂有功矣昔者孔子善子路
治蒲而孟子譏子產不知爲政則邦之改作亦有不得
已者乎得已而不已者侈不得已而已者怠怠非也侈
非也若侯之作其宜乎可謂知爲政者也於是州之人
來求予文刻之石著侯之功使來世尚有考也

吳縣修和豐倉記

近世爲政者率重改作雖然政有墮壞將坐視其墜乎
有垢弊將坐視其焚乎固有所不能也不能則將起其

墜理其焚改其舊而新是圖圖之道有二一曰因天二
曰因人因天莫善乎循其跡因人莫善乎順其心今天
下財賦大半出於東南蘇郡居十之七八吳爲縣居郡
之二三焉其歲貢京師者爲石至八萬四百留縣者一
萬六百轉輸淮揚鳳及兗軍者又三萬九千三百夏稅
三千四百有奇又有所謂加耗者不在是數而皆於和
豐焉是儲倉初於正統己巳巡撫周文襄公之爲也迄
今蓋五十六年矣弘治壬戌遼陽孫侯伯堅來知縣事

政治敷宣奸宄屏息侯憫吳民之憊也顧未嘗有所興作甲子二月和豐之月宇殿災民未遽怪也三月張宇殿又災五月視事之堂又災人情大駭侯獨晏然曰吾知之天其欲吾之重新焉耳乃命撤污扶傾鳩工庀材二殿重新堂寢具完非侈非陋經始於五月日至十月日儻功焉非所謂因天而循其跡者乎問材焉取不戒是懲問工焉出不毛是罰非所謂因人而順其心者乎因天之跡則民不怨因民之心則役不勞孫侯可謂善

爲政也於是吳民相率求予記其成以彰侯之美蓋是堂之作有三民財之歛也於斯其散也於斯其訟之聽也於斯歛之貴平無徒取其贏也散之貴周無徒取其嗇也聽之貴公且明無徒取其速也是政之大者也吾故爲記之壁以規于來者

思忍堂記

大凡物衆相聚則心不能皆同不同則不能無私私則戾戾則忿忿則爭爭則渙然而散故前世之累世同居

者亦以爲異若宋江州陳氏近世浦江鄭氏而張公藝氏最著歟方氏遠有承緒有儲仙翁者顯於漢玄英先生以詩鳴唐宋有諱豐者始遷婺源以輔之大父諱功復兄弟四人奉母撫孤一門敦睦至以輔又欲自三世四世傳之百世而恐子孫之不能同也大書忍字於堂使子孫睹而思之蓋取諸公藝之言九人之忿爭起於相責望責望起於是已而非人已果是也人果非也忍之斯已使兄弟之間有所責望思之曰如吾先人何則

相與忍之娣姒之間有所責望思之曰如乃先人何亦
相與忍之推之尊卑長幼皆然則心一一則無忿無忿
則爭安從生故曰必有忍乃其有濟小不忍則亂大謀
雖然家之有忍以有忿且爭也無忿無爭則何事于忍
古之君子化行於家家庭之間雍如也敦睦之效木有
連理者矣猶有相乳者矣犬有一牢食者矣况人乎哉
如是則亦何事于忍是故心之同而無所事忍上也有
所忿而能忍之次也有所忿而不能忍斯下矣方氏子

孫尚以是思之

興福寺山居記

浮圖氏之道有合乎吾儒之所謂靜何也達摩西來傳
佛語心心或撓焉則安得而寂或淆焉則安得而清或
翳焉則安得而明是故亦有資乎靜也靜斯定矣慧矣
然後惟其所之靜亦靜也動亦靜也洞庭有湖山之勝
而恒患於偪獨所謂俞塢者窈然而深坦然而夷長松
攬天嘉花異果紛峙羅列而興福寺又據其勝占其幽

勤上人又擇其巉絕之處作山居焉旦莫焚修終年蔬
食年且九十而貌如少壯者非有得于靜耶若吾人之
所治者何靜而安而慮而得其素講也顧擾擾焉日馳
乎外非名而利有若勤之靜且專乎是不能無媿於彼
也然吾有問焉勤之靜也惺惺然專一之中其有所主
乎其無所主乎有所主則倚無所主則蕩則所謂靜而
定者其亦難乎故因其居之成爲記諸壁而因以問之

高真堂記

東洞庭之陰有峰端正娟秀曰嵩夏嵩之麓呀然下飲
太湖如鳥之張喙曰梁家瀨前爲太湖其襟抱虧疎浪
石鬪齧自宋時則有高真堂以鎮其衝元季兵燬光怪
時見行者相戒莫敢出於其途成化間里人上其事於
縣作祠肖玄武像以鎮之於是光怪滅息人和歲豐相
率請予記其事謹案文耀鉤云北宮黑帝其精玄武北
方之神也真誥則云昔軒轅子昌意娶蜀山之女生陽
德號顓頊仗萬靈以信順監衆神以導物役御百氣召

致乎雷雨於是謀夫獻畫丁壯用命改築河流避危趨
易又䟽諸泉以壯其源增諸堰以節其流漕道斯通公
私利之蓋百三十年于茲然每當春夏旱熯爲虐河流
如帶漕艘鱗次待濟者千萬又况中外臣工朝正獻新
商貨番琛四面駢集爭先覲便致攘噉欲疾而遲欲
通而窒惟分司得人䟽濬有法則旱乾爲水溢啟閉有
程則鬭爭爲退讓舳舻千里魚貫而至後不敢先先不
敢亂則維仲錫無忝斯任河流湯湯千艘萬檣武夫洸

沈不譁不爭粵惟都水君之令皇都翼翼京庾維億陳
陳其積旣安旣足是維都水君之績仲錫曰前人之功
其何可泯用鑱諸石以無忘其始

醒酣亭記

橫山在西洞庭之西望之甚小而峯巒秀潤亭臺高下
里巷交錯雞犬鳴吠殆物外之奇境也予自內閣乞歸
有山人邀予至其境觴予于湖心亭上是日秋高風靜
而濤聲自湧自東望之千山在其南紹山在其北亭山

宛然如蓋適當其中餘若陰長葉餘諸山出沒掩覆殆不可狀予素不能飲酒是日飲至十觴亦不醉因扁其亭曰醒酣是歲正德四年也

吳興閔氏重修先塋記

前人有作慎而承之爲孝玩而墮之爲怠且荒世所知也况夫生而營焉心力之所萃死而安焉體魄之所藏乎其尤重也正德丁卯光祿大夫柱國太子太保刑部尚書閔公致仕歸吳興瞻拜先塋喟焉興歎旣而來言

于鑿曰惟吾始祖將仕府君自汴扈宋來歸吳興遂于
晟溪家焉九十有一世矣元延祐至治間歸安教諭府
君實始墳于茲享祀有堂合族有室延賓有館供祀有
田中爲神祠外爲僧舍下至寢庫庖湍罔不備具所以
覆芘我後人者至矣元季兵興塋乃毀焉國朝正統間
先中和府君治之始復于舊世遠支分樵牧無禁塋又
毀焉不肖孫蒙先人之休克有祿位歷事四朝封及三
世階一品位八座恩光下賁侈矣而丘隴不治予用是

懼早夜孜孜乃鳩工庀財完舊益新越二年始克有成
緒祀先合族既復其初繚以周垣嚴以重門華表碑碣
石獸翁仲咸如令式雖然前人之作不能不廢于今今
之作又安知不廢于後乎惟執事爲記于碑詔我後人
俾勿壞予乃復于公曰凡物無常惟德無毀故爲久遠
慮者莫若培之以德惟閔之先世有令德遂濟登茲前
人之所貽遠矣惟公厚德高標蔚爲名臣作鎮南荒洞
獠率服持法西臺庶獄克慎蘇公之長王國公殆有焉

公之所以培于後者深矣遠矣先墓所在過者必式況公後人其獨忘諸乎公又何慮焉其必能繼繼承承嗣公之志而無怠也用是碑諸隧以告墓在吳興城東北之勅字園

東丘會老記

凡歸于鄉者歲時有會所以敦契誼崇齒德暢淫鬱而示鄉人以禮也示鄉人以禮者所以接之於道作敬讓而遠于鬪辨也其猶古鄉飲之遺乎自鄉飲酒之禮廢

而後有香山之會洛陽之會睢陽之會以為希闊之舉而侈談焉斯亦會之近古者也正德己巳宜興之仕而歸者十一人城東有周孝侯祠祠有崇丘茂林深池廣陂可以遊而樂也前山東副使邵君用之始經營之面丘作堂堂之後有閣閣之西有樓以為燕饗之所良辰美景諸老咸萃坐不叙爵尚年也品物有數而不及豐尚儉也爵行無算而不過醉尚敬也主不勸賓不辭尚真率也獻酬既備奕者釣者吟者登高者各適其適而

無禁焉予過宜興覽而歎曰鄉飲之禮古也香山諸會
之後繼者無聞焉豈非難哉今夫一鄉之中登仕版者
幾人仕而保終吉以歸者幾人歸而康且同志合義者
又幾人故曰難諸老生同鄉仕同朝歸同榮又同志也
於古人之所難得者其咸得之矣況夫尊讓潔敬而接
鄉人于道斯君子之所重也非特燕游之樂而已予故
為記之十一人者為某某咸繪像于壁使後之人得企
而瞻焉

東望樓記

人情隨所處而異處其曠則坦然以夷處其高則迥然以爽處其深則闐然以幽弘治壬戌吾弟秉之始去洞庭築室乎太湖之堦其西南湖波渺瀰雲帆掩映其東北平田際天禾黍被埜望之不見其端可謂曠矣靜矣乃獨闕其高予曰是宜爲樓焉以瞰乎遠據乎勝弟曰諾召工相方不決旬而樓成他日謁予登之忽焉若飄騰以超乎埃壘遠山偕來顯設天際北望則橫山靈巖

若犇雲停霧西望則鸞隆長沙隱現出沒若與波升降
東望則洞庭一峰秀整娟靜松楸鬱鬱若可掇而有也
或郊原霽雨草樹有暉或墟落斜陽烟雲變態於是弟
勸兄酬舉酒相屬曰樂哉游乎是樓於勝無所不領於
望無所不宜而獨曰東望者惓惓故土水木本源之義
也其詩曰朝望兮東山夕望兮東山東山宛其在目兮
欲濟而艱莫釐崔嵬兮西金晡霽我家何在今限湖波
之如帶鬱鬱松楸瞻企斯勤朝往莫來曾不如彼白雲

雲升于天水返于壑我行四方不日其復

慈湖書屋記

有自淞東來者曰走也作室於慈溪之慈湖湖先正楊
文元公之遺也吾居濱焉吸清漱芳挹其高風餘韻於
斯道庶有聞乎唯執事記之以勗其成吾聞之也慈湖
之學蓋出陸子靜氏子靜之學與朱子異而當時號稱
簡要越人為其學者尤衆至列屋澄坐內觀吾不知其
所觀者果何事哉子靜之言曰心之神明是謂聖故其

教人必求諸心抑子靜之所謂內觀與朱子之所謂涵養異乎不異乎今朱子之學海內宗之子靜之學殆絕矣世無復知者顧其頴脫超詣有非言之可傳而遂泯然無傳焉可不惜乎慈湖初見子靜謂於言下有悟潏然清明應用無方其感動悟入如此今越中豈無傳其學者乎子歸而求之予也願預聞焉

且適園記

太湖之東有間田焉南望包山數里而近北望吳城百

里而遙吾弟秉之行得之喜曰吾其憇於是乎包山信
美矣有風濤之恐吳城信美矣有市廛之喧茲土也得
道里之中適喧靜之宜其田美而羨其俗淳而和吾其
憇於是乎廼構屋買田且畊且讀旣又闢其後為園雜
蒔花木以爲觀游之所橘洞庭所宜也作亭曰楚頌作
軒臨田曰觀稼作亭瞰池曰觀魚餘若格筆峰浣花泉
理絲臺歸帆涇菱港蔬畦柏亭桂屏蓮池竹徑叅峙彙
列又作樓曰東望示不忘本源也予往來必憇焉與吾

弟觀游而樂之因名其園曰且適予於世無所好獨觀山水園林花竹魚鳥予樂也昔官京師作園焉曰小適今自內閣告歸又作園焉曰真適蓋至是始足吾好焉耳若吾弟則豈真適乎是哉其亦暫寓乎此者也吾弟少與予相從學相若也行相若也所負所養相若也而顯晦不同然予弟不懟不變不沮曰天其果遂窮予乎予且適于斯以竢之無戚戚者天其或有時而達予乎予且適于斯以竢之無汲汲者窮達進退遲速一委諸天

而不以概于中是所以爲適者也雖然有一焉吾聞
古之人重去其鄉包山故土也第其能遽忘諸乎弟曰
諾吾將歸矣

震澤集卷十六

欽定四庫全書

震澤集卷十七

明 王鏊 撰

記

天趣園記

延平多佳山水而蕭君九成之園特占其勝九成之言曰凡觀游勝槩以人力為之則費且勞因其故焉則省且佚吾之有是園也吾無作焉其景有十皆因其故為之園東抵高山山之麓青壁數仞蒼翠巉絕有巖巖之

氣象是為石壁石壁之下巨石坡陀平衍可坐數人曰盤石泉出山下自南流入旱澇不見盈涸曰源泉源泉號號西北詰屈流導為流觴曰曲水曲水流數十步緒以大池廣可數畝曰方池水自池下流日夜不息作碓其傍其機自動不煩人力曰水碓水抵北復南折為大溪有石臨之曰釣磯石壁之左有窟如屋相傳昔人煉丹於此曰丹穴曲水分支西流有軒瞰其上曰漱清緣溪作亭溪外諸山隱隱可見曰仰高山之松竹杉桂四